



Bekerja sambilan menjadi pilihan pelajar untuk mencari duit poket bagi menampung peningkatan kos sara hidup terutama di bandar.

Mahasiswa bekerja sambilan perlu bijak urus masa

Oleh Nor Azma Laila
norazma@bh.com.my

► Kuala Lumpur

Mahasiswa yang berjaya mendapat pembiayaan pendidikan seperti biasiswa dan pinjaman bagi menyambung pengajian di universiti awam (UA) atau institusi pengajian tinggi (IPT) mungkin boleh berasa sedikit lega kerana tidak perlu risau perbelanjaan bulanan dan yuran pengajian.

Meskipun begitu, peningkatan kos sara hidup di bandar sedikit sebanyak menyebabkan segelintir mahasiswa, terutama yang menuntut di bandar besar terpaksa mengambil keputusan untuk bekerja sambilan bagi menampung keperluan dan kelangsungan hidup di kampus seterusnya meneruskan pengajian mereka tanpa masalah kewangan.

Tidak kurang juga, ada yang memilih untuk melakukan kerja sambilan kerana mahu mengisi masa lapang, mencari duit poket dan mendapatkan pengalaman bekerja dengan lebih awal sebelum menceburi dunia pekerjaan yang sebenar pada masa depan.

Pelbagai kerja sambilan menjadi pilihan mahasiswa

pada hari ini, termasuklah menjadi pembantu di restoran makanan segera, penghantar makanan, membuat kerja pembersihan rumah dan juga berniaga secara dalam talian atau pasar malam.

Bagi pelajar jurusan Ijazah Sarjana Muda Psikologi, Universiti Kebangsaan Malaysia (UKM), Muhammad Iqbal Mohd Tajuddin, beliau memilih untuk bekerja sambilan kerana faktor kewangan sekali gus mahu meringankan beban keluarga.

Katanya, beliau memang mendapat pinjaman tetapi duit yang diberikan itu tidak cukup untuk menampung keperluan sepanjang semester kerana banyak digunakan untuk membeli buku dan menyiapkan tugas.

Latih diri berdikari

"Oleh itu, saya mengambil keputusan untuk bekerja sambilan sebagai pekerja penghantar makan restoran makanan segera dengan bayaran gaji RM5 untuk satu jam bekerja dan setiap satu tempahan yang dihantar, saya akan mendapat RM2.

"Saya baru sahaja memulakan kerja ini sejak beberapa minggu lalu. Sebelum ini, saya bekerja sebagai penghantar barangan alat ganti kereta dengan gaji RM500 setiap bulan tetapi membuat kepu-



Muhammad Iqbal



Nur Awatif Insyirah

tusan berhenti bagi mencuba kerja yang lain," katanya.

Sepanjang bekerja, Muhammad Iqbal berkata sudah tentunya masa menjadi cabaran utama kerana beliau bekerja setiap hari sekali gus menuntut dirinya untuk bijak menguruskan jadual supaya pencapaian akademik sentiasa berada pada tahap membanggakan.

Sementara itu, pelajar Ijazah Sarjana Muda Biologi, UKM, Nur Awatif Insyirah Ahmad Puad, turut memilih untuk melakukan kerja sambilan kerana mahu mencari pendapatan sampingan bagi menampung perbelanjaan harian sekali gus melatih diri berdikari dan merasa sendiri pengalaman bekerja.

"Buat masa ini, saya bekerja di kafe yang terletak di UKM dan membuat pelbagai kerja di situ, termasuklah menjadi juruwang dan pembancuh air serta membakar kek dan pastri dengan pendapatan harian antara RM20 hingga RM30 sehari.

"Cabaran bekerja sambilan ini sudah tentunya masa saya menjadi terlalu padat dengan pelbagai aktiviti sekali gus menuntut saya untuk menjadi seorang yang kuat dalam menempuhi kehidupan ini kerana pilihan yang dibuat ini bukan untuk diri saya sahaja tetapi juga bagi mem-

bantu meringankan beban keluarga," katanya.

Utamakan pelajaran

Pelajar Ijazah Sarjana Muda Pengajian Islam dan Sains Pengurusan Alam Sekitar, Universiti Malaya (UM), Fatm Rabiatul Adawiyah Muhammad, pula berkata pada mulanya keputusan untuk bekerja sambilan itu sekadar suka-suka dan ingin mencuba tetapi lama kelamaan mula selesa berbuat demikian.

"Saya teruskan sahaja bekerja di kafe yang terletak di dalam UM dan saya bertuah kerana majikan sangat memahami keadaan saya sebagai pelajar dan memberikan kebebasan masa bekerja mengikut jadual pengajian saya.

"Saya bekerja kira-kira 10 jam seminggu dan gaji dibayar RM5 sejam yang mana gaji bulanan bergantung kepada jumlah jam bekerja setiap bulan," katanya yang bekerja kira-kira 40 jam sebulan.

Beliau berkata, bagi pelajar yang ingin bekerja sambilan mereka perlu bijak menguruskan masa antara kerja dengan belajar.

"Pastikan niat utama masuk universiti adalah untuk belajar bagi mengungguli segulung ijazah, jadi utamakan yang perlu diutamakan," katanya.